

Lukas 17:5 Rasul-rasul matur lēq Junjungan Saq Mulie Deside Isa, "Teguqang iman tiang pade."

Roma 10:17 Keranaq nike, dengan-dengan jari beriman sēngaq ie pade dengah berite. Dait berite nike tedengah sēngaq araq dengan saq nyampēang manik Almasih.

Lukas 11:1 Lēq sopoq jelo Deside Isa bedo'e lēq sopoq taoq. Sesampun le inggas bedo'e, salaq sopoq lēman pengiring-pengiring-Ne matur, "Junjungan Saq Mulie, tunas Pelungguh ajahang tiang pade bedo'e maraq Yahya ngajahang pengiring-pengiringne bedo'e."

1 Timotius 2:1-4 Pertame-tame, sanget siq tiang tunas adēq petunasan, do'e serte ucapan syukur tesampēang tipaq Jehovah umaq selapuq dengan; 2 umaq raje-raje dait umaq selapuq dengan saq bekuase. Tunas adēq ite bau idup tenang dait tentrem dalem selapuq kesolēhan dait kehormatan. 3 Nike saq solah dait saq nyenengang Jehovah, Juruselamette. 4 Jehovah kayun adēq selapuq dengan teselametang dait mauq penenaoq mengenai kebenaran.

Zakaria 3:1,2 - Yudas 1:9 Mikael mēsaq, saq jari datune malaēkat-malaēkat nike, ndēqne uwah piaq maraq nike. Sewaktu ie betungkasan kance Belis mengenai mayitne Musa, Mikael ndēqne bani hakimin Belis siq ucapan-ucapan saq menghine. Ucapan Mikael cume maraq niki, "Tuhan gen semprak side!"

Epesus 6:12 Sēngaq ite bejuang ndēqne ngelawan manusie, laguq ngelawan selapuq kekuatan sētan-sētan saq nguasein jaman saq jahat niki. Ite ngelawan roh-roh jahat saq araq lēq awang-awang.

Epesus 6:10,11 Ahirne, side harus jari kuat siq kekuatan saq side pade mauq lēman kuase Tuhan, sēngaq side pade araq lēq dalem Tuhan. 11 Pade kadu selapuq perlengkapan perang saq teicanin siq Jehovah, adēq side pade bau tahan ngelawan siasat-siasat Belis saq licik nike.

Epesus 6:13-17 Keranaq nike, mangkin, pade kadu selapuq perlengkapan perang Jehovah, adēq lēq jelo saq jahat, side pade sanggup ngelawan serangan-serangan musuh. Dait adēq sesampun side pade bejuang jangke tutuq, side pade masih gagah perkase. 14 Side pade harus tetep bejage-jage. Pade kadu kesetieande lēq Jehovah jari sabuk, dait ketulusan jari kelambi besinde. 15 Kerēdeande jari beriteang Kabar Solah damē sejahtere jari sepatunde. 16 Sebilang waktu kadu percayende tipaq Tuhan jari senjate penangkis, siq care nike side pade bau kalahang selapuq anak panaq berapi lēman si jahat. 17 Pade bait keselametan jari songkoq waje, dait Manik Jehovah jari klēwang lēman Roh Jehovah.

Ibrani 4:12 Manik Jehovah nike idup dait kuat; merangan lēman selapuq klēwang saq bemangan due. Manik nike nusuk dalem gati jangke misahang

jiwe dait roh; sendi-sendi dait sumsum, malahan bau bēdeang pikiran dait niat atē manusie.

Lukas 4:8 Jawab Deside Isa, "Lēq dalem Kitab Suci araq tetulis, 'Pade sembah Jehovah, Tuhan side dait tipaq le doang side beribadah.' "

Epesus 6:18 Laksaneang selapuqne nike sambil bedo'e jari tunas pertulungan lēman Jehovah. Lēq sebilang kesempatan, pade bedo'e lēq dalem Roh dait side pade harus tetep bejage-jage lēq dalem do'ende nike siq petunasan saq ndēq araq tutuqne umaq selapuq dengan-dengan saq tehususang bagi Jehovah.

1 Samuel 17:45-47 - Daud & Goliath

Lukas 10:17-20 Waktu kepituq pulu pengiring nike tulak, angen ie pade cemoh gati. Terus ie pade matur, "Junjungan Saq Mulie, sētan-sētan ēndah taat lēq tiang pade lamun tiang pade prēntah ie pade siq pesēngan Pelungguh!" 18 Jawab Deside Isa, "Tiang serioq Belis geriq lēman langit maraq kisap. 19 Setetune, side pade sampun Tiang bēng kuase adēq side pade bau ngicaq ulah dait teledu serte kuase jari nahen selapuq kekuatan musuh, sehingga ndēq araq saq gen bahayeang side pade. 20 Timaq maraq nike ndaq gembire lantaran sētan-sētan taat lēq side. Laguq solahan side pade gembire sēngaq arande tecatet lēq sorge."

2 Korintus 10:3-5 Mule tiang pade masih idup lēq dalem dunie, laguq perjuangan tiang pade ndēqne siq dasar tujuan duniawi. 4 Senjate-senjate saq tiang pade kadu lēq dalem perjuangan tiang pade ndēqne senjate dunie niki, laguq senjate-senjate Jehovah saq bekuase. Siq senjate-senjate nike tiang pade ngancurang bēntēng-bēntēng. 5 Tiang pade ngancurang pikiran-pikiran saq nyusatang dait segale macem kesombongan saq nentang penenaoq jari kenal kance Jehovah. Tiang pade taklukang pikiran dengan-dengan dait miaq ie pade taat tipaq Almasih.

2 Timotius 1:7 Sēngaq Roh saq Jehovah icanin tipaq ite, ndēqne Roh saq miaq ite jari penakut. Sebalikne Roh Jehovah nike miaq ite jari kuat, penoq siq kasih dait tao nahen diriq.

Matius 12:28,29 Laguq setetune Tiang sediq sētan kadu kuase Roh Jehovah. Nike artine bahwe Kerajaan Jehovah sampun rauh lēq side. 29 Berembē dengan bau tame ojok dalem balē sopoq dengan saq kuat, jari ngerampus dowēne lamun ie ndēq juluan sēkoq dengan saq kuat nike? Sesampun sēkoqne, baruq ie bau ngerampus dowē dengan nike.

Epesus 1:13 Side pade ēndah sampun jari dengan-dengan saq tehususang bagi Jehovah sewaktu side pade dengahang manik kebenaran, nike Kabar Solah saq nyelametang side. Lēq dalem Almasih ēndah, side pade tesahang siq Roh Suci, saq tejanjiqang nike.

Rasul-Rasul 19:6 Dait lēq waktu Paulus noloq imene lēq atas ie pade, Roh Suci turun lēq ie pade, terus ie pade mulai ngeraos kadu base lain dait benubuat.

Markus 16:15-18 Beterus Deside Isa bemanik lēq ie pade, "Silaq lumbar ojok seantēro dunie dait beriteang Kabar Solah lēman Jehovah tipaq selapuq mahluk. 16 Dengan saq percaye dait tebaptis gen selamet, laguq dengan saq

ndēq percaye gen tehukum. 17 Sebagē bukti bahwe ie pade percaye, dengan-dengan nike gen sediq roh jahat kadu aran Tiang; ie pade gen ngeraos kadu macem-macem base saq ndēq ie pade kenal. 18 Lamun ie pade negel ulah atao nginem racun, ie pade ndēq gen celake. Lamun ie pade noloq imene lēq atas dengan-dengan saq sakit, dengan-dengan nike gen selah."

1 Yahya 1:9 Laguq lamun ite ngaku dose-dosente lēq Jehovah, make le setie dait adil, sehingga le gen ngampunin dose-dosente dait nyuciang ite lēman selapuq kejahanan.

Zabur 109:17 - Yakub 3:10 Lēman biwiq saq pade sugul ucapan-ucapan berkah dait ēndah ucapan-ucapan kutukan. Sepatutne ndēqne maraq nike.

Hakim 16:16 - 2 Petrus 2:7,8 Laguq le nyelametang Lot, dengan saq solēh nike, saq menderite gati siq kelakuan dengan saq idupne turut hawe napsu lantaran ndēq taat lēq hukum Jehovah. 8 Lēq tengaq dengan-dengan saq maraq nike, Lot saq solēh nike idup menderite batin, sēngaq sebilang jelo serioq dait dengah perbuatan-perbuatan ie pade saq jahat.

Epesus 4:26 Lamun side pade sili, ndaq alurang hal nike jari penyebap side pade bedose. Ndaq sili sejeloan,

Roma 14:12 Jari, ite sopoq-sopoq harus betanggung jawab lēq selapuq perbuatante tipaq Jehovah.

1 Yahya 2:23 Dengan saq ndēq ngakuq Bije saq asalne lēman Jehovah, artine ndēq nerimaq Bapa ēndah. Dait dengan saq ngakuq Bije saq asalne lēman Jehovah, artine nerimaq Bapa ēndah.

Yahya 14:6 Jawab Deside Isa, "Tiang niki langan dait kebenaran dait idup. Ndēq araq sopoq dengan juaq saq bau parek tipaq Bapa lamun ndēq langan Tiang.

Matius 11:28-30 Silaq dateng ojok Tiang selapuqde saq lelah dait saq bedowē bandean berat; Tiang gen bēng kelepasan tipaq side. 29 Pade turut selapuq prēntah Tiang, dait berajah lēman Tiang. Sēngaq Tiang niki lemah lembut dait rendah atē, make jiwende gen mauq ketenangan. 30 Sēngaq prēntah-prēntah Tiang nike miaq seneng dait bandean Tiang nike ēndah dēang."

2 Korintus 6:2 Lēq Kitab Suci, Jehovah bemanik, "Lēq waktu Tiang seneng, Tiang sampun dengahang side, dait lēq jelo penyelametan, Tiang sampun nulung side." Mangkin niki waktune Jehovah seneng, mangkin niki jelo penyelametan nike!

Roma 10:13 Dalem Kitab Suci tetulis, "Selapuq dengan saq ngempoh pesēngan Tuhan gen teselametang."

Exodus 20:5 - sin cursed to 3 & 4 generations